


HISTORIA BREVE DI DIFUNTO CLINTON WHITEFIELD DEN KIWANIS



ORANJESTAD (AAN): Na aña 1963-64 un amigo di Rotary Club a acerca Clint como e unico persona cu por haci e tarea dificil di organiza y funda un club di Kiwanis na Aruba. Siendo presidente di Camara di Comercio, tambe Camara di Comercio de las Americas y un miembro dinamico y energetico den comunidad asina mes Clint a acepta e reto di bira e prome presidente di Kiwanis Club Aruba na aña 1965. Asina tambe Kiwanis Club di Aruba a cuminsa cu e labornan pa cu e comunidad di Aruba poniendo atencion na esnan cu mas mester un man pa progreso.

Di 1968 pa 1969, Clint tabata Lieutenant Governor, actuando tambe temporalmente den e funcion aki entre aña 1969-70 y 1973-74. Pa corona e carera di e difunto como miembro di Kiwanis el a ser eligi como Gobernador di "Eastern Canada & Caribbean" pa aña 1978-79. E.C. & C. ta e seccion internacional di mas grandi na mundo di Kiwanis.

Clint siendo Gobernador di esaki mester a carga un gran responsabilidad y un estadia di nos menos cu un aña na Canada tabata un obligacion como Gobernador. Pues Mosa y Clint a viaha pa e pais ey lagando atras negoshi, conocir-, y famianan na Aruba pa un aña largo. Tur momento Clint tabata conta

cu e apoyo di Kiwanette Mosa cu semper tabata banda di dje durante tur e bishitanan na e 26 divisionnan.

Durante e gobernacion aki di Clint, e tabata tin como tarea tambe pa reuni y bishita miembronan diplomacia internacional, hecuta aperturanan internacional di Kiwanis, efectua instalacionnan den e 26 divisionnan y eherce e tarea duro di gobernacion.

Kiwanis Club di Aruba ta orgulloso cu di e forma aki difunto, Clinton Whitfield a demostra e capacidad di un yiu di tera, sirbiendo asina tambe como un embahador inoficial di Aruba. Kiwanis Club di Aruba a worde administrativamente oficialmente reconoci internacionalmente 20 di Februari 1965. E mesun aña Kiwanis International tabata celebrando nan aniversario di oro. Durante un cena di gala na Strand Hotel e prome presidente di Kiwanis Club di Aruba, Clint a ricibi e charter for di man di e gobernador saliente.

Un mensahe cu Clint a duna durante su gobernacion tabata inspira riba e palabra "Hunto": Bini hunto kier meen cuminsa. Keda hunto kier meen Progreso. Traha hunto kier meen exito!

Riba e foto por mira momento cu difunto Clinton Whitfield a ricibi e charter asina bira e prome presidente di Kiwanis Club di Aruba.